



ROYAL PALACE
KINGDOM OF LESOTHO

POLELO EA MOTLOTLEHI LETSIE III MABAPI LE HO
KHUTLELA TŠEBETSONG HOA PARAMENTE EA LESHOME
23 PHATO, 2023

SECHABA BA HESO,

KE BOETSE KE HOA MALUME HO LONA SECHABA SA
THESELE. LETSATSING LENA KE HLAHA KA PELE HO LONA
HO AROLELANA LITABA TSA NAHA EA RONA TSA MORAO-
RAO, EBILE E LE TSA BOHLOKOA RURI.

LE TLA HOPOLA SECHABA SA HESO HORE HA KHOELI ENA
EA PHATO E HLOLA MATSATSI A LESHOME LE METSO E
MERARO, PARAMENTE EA LESOTHO E ILE EA FELLOA KE
NAKO EA EONA EA LILEMO TSE HLANO TSEO E NENG E LI
BALLETSOE KE MOLAO OA MOTHEO. HA LETSATSI LEO LE
LIKELA, PARAMENTE ENE E NTSE E KENE KHABONG KA
THATA E TŠOERE MOSEBETSI OA BOHLOKOAHALI OA



ROYAL PALACE
KINGDOM OF LESOTHO

SECHABA O RERETSOENG HO TLISETSA NAHA E RONA BOTSITSO, KHOTSO, LE PUSO E NTLE. HA PARAMENTE E FELLOA KE NAKO PELE E QETA MOSEBETSI OA EONA OA BOHLOKOA, LESOTHO LE ILE LA IPHUMANA LE LE MATEANONG A LITSELA, 'ME RA TLAMEHA HO KHETHA HORE NA RE EA PELE JOANG HO QOBA MATHATA A NENG A BONAHALA A TJAMETSE SECHABA LE NAHA.

KE MOTHATING ONA MOO MOHLOMPHEHI TONA-KHOLO A ILENG A BEHA KOPO HO LEKHOTLA LA NAHA HORE LEKHOTLA LEO LE MO LUMELLE HO PHATLALATSA MAEMO A TLOKOTSI LE IPAPISITSE LE KAROLO EA PELE EA TEMANA EA MASHOME A MABELI A METSO E MERARO (23 (I)) EA MOLAO OA MOTHEO. LEKHOTLA LA NAHA LE ILE LA ANANELA KOPO EA TONA-KHOLO, 'ME TONA-KHOLO A PHATLALATSA MAEMO AO A TLOKOTSI HO TLOHA LETSATSING LA LESHOME LE METSO E TŠELETSENG HO ISA LA MASHOME A MABELI A METSO E ROBONG, KHOELING ENA EA PHATO.



ROYAL PALACE
KINGDOM OF LESOTHO

PHATLALATSO EA MAEMO A TLOKOTSI KAPA QOMATSI, KE EONA TSELA EA MOLAO E KA BULELANG PARAMENTE EA LESHOME MONYETLA OA HO PHUTHA LIQOLA LITABENG TSE AMANG SEHLOMATHISO SA LESHOME LE MOTSO O MONG OA MOLAO OA MOTHEO, LE SEHLOMATHISO SA MOLAO OA LIKHETHO. KA LEBAKA LENA, LEKHOTLA LA NAHA, LE IPAPISITSE LE KAROLO EA BOBELI EA TEMANA EA MASHOME A ROBELI A METSO E MENE (84 (2)), LE ILE LA NKELETSA HO BITSA PARAMENTE EA LESHOME HO BOELA TŠEBETSONG. PARAMENTE E TLA BOELA MOSEBETSING OA EONA HO TLOHA KA LABORARO LA LA MASHOME A MABELI A METSO E MENE HO ISA MANTAHA OA LA MASHOME A MABELI A METSO E ROBONG KHOELING ENA EA PHATO.

BASOTHO BA HESO,

HA KE NE KE BULA LE HO HLOMAMISA PARAMENTE ENA EA LESHOME, KE ILE KA BOLELA HORE RE QALILE LEETO LA



ROYAL PALACE
KINGDOM OF LESOTHO

LILEMO TSE LING TSE MASHOME A MAHLANO, TSEO KE ILENG KA LI REHA LILEMO TSA KHOLO LE KATLEHO (FIFTY YEARS OF GROWTH AND PROSPERITY). KA TSOELA PELE HO BONTS'A HORE KE TUMELO EAKA EA HORE RE ITHUTILE KA LILEMO TSE MASHOME A MAHLANO TSE FETILENG, 'ME RE BONE MOO RE ILENG RA KHOPTJOA TENG, 'ME RE IPHILE BOHLALE BA HO LOHA MALEPA A TLA RE QOBISA LIFI TSE TSELENG EA RONA EA KHOLO.

KE ILE KA ETSA THAPELI HO **LITHO TSE KHABANE TSA PARAMENTE**, LEBITSONG LA SECHABA SENA SA MORENA MOSHOESHOE, HORE TABA EA TLHOPHO-BOCHA EA LESOTHO E SEBETSOE KA MATLA LE KA 'NETE EOHLE KE BOHLE BA NANG LE KOBO EA BOHALI, HAHOLO-HOLO LONA BAETAPELE BA SECHABA, KA MAFAPHA OHLE A LONA. KE ILE KA ETSA KOPO E KHETHEHILENG HO LONA LITHO TSE KHABANE TSA PARAMENTE HORE HA LE KENA MOSEBETSING OO O MATLA, LE TLE LE BEHE LITABA-



ROYAL PALACE
KINGDOM OF LESOTHO

TABELO TSA BASOTHO PELE HO TSA LONA LE MEKHA EA HABO LONA EA LIPOLOTIKI HOBANE LE BAEMELI BA SECHABA SA BASOTHO, SE BEILENG TŠEPO EA SONA HO LONA HORE LE BA SEBELETSE KA TOKA LE MOHAU, LE KA MEKHOA EOHLE E LOKELANG.

KE NE KE ETSE THAPELI LE BOIPILETSO BONA BO MATLA HO LITHO TSE KHABANE, KE IPAPISITSE LE BOHLOKOA BA LENANE LA TLHOPHO-BOCHA – RURI LENANE LE ETSANG NALANE LILEMONG TSENA TSE KA BANG MAKHOLO A MABELI JOALE NAHA EA LESOTHO E THEHILOE KE MORENA MOSHOESHOE I, EENA EA ILENG A E THEHA HOLIMA KHOTSO, HOBA A NE A LUMELA HORE **“O KA NKETSANG HA E AHE MOTSE, MOTSE HO AHOA OA MORAPELI THESELE”**.

TLHOPHO BOCHA E BONAHALA ELE MONYETLA OO RE NTSENG RE ENA LE OONA OA HO TLISA KHOTSO LE BOTSITSO LE HO TIISA LITSI TSA RONA TSA PUSO. TLHOKAHALO EA KHOTSO LE BOTSITSO TSEO ESALENG LI



ROYAL PALACE
KINGDOM OF LESOTHO

APERETSE NAHA EA HABO RONA, HA E SALE E FUMANA
BOIPUSO, KE TABA E RE TŠOENTSENG BOHLE.

KE NKA MONYETLA ONA HO LEBOHA BOHLE BA ILENG BA
IKAKHELA KA SETOTSOANA TŠEBETSONG ENA EA
BOHLOKOA. KE QALA PELE KA HO LEBOHA LONA SECHABA
SA BASOTHO KA HO FANA KA MAIKUTLO A LONA HORE N'A
LE KA RATA HA NAHA EA HABO LONA E KA TSAMAISSOA
JOANG. RE LEBOHA 'PARAMENTE, KA MATLO A EONA A
MABELI, KA MOSEBETSI OO BA O ENTSING HO FIHLA MONA.
RE LEBOHA LEKHOTLA LA TLHOPHO BOCHA (NATIONAL
REFORMS AUTHORITY) LE BOHLE BA SEBELITSENG LE LONA
HO BONA HORE RE HATELA PELE MOSEBETSING ONA OA
BOHLOKOA. RE BOETSE LEBOHA LINAHA LE MEKHATLO EA
MACHABA E ILENG EA TLATSETSA TŠEBETSONG ENA.

BASOTHO BA HESO,



ROYAL PALACE
KINGDOM OF LESOTHO

LEHA MOHLOMPHEHI TONA-KHOLO A PHATLALALITSE MAEMO A TLOKOTSI KAJENO, EMPA KAOFELA REA TSEBA HORE, RE LE NAHA RE PHETSE TLASA MAEMO A KA BITSOANG A TLOKOTSI NAKO E TELELE. LINTOA, LIPOLAEANO TSE SEHLOHO, LIQHOBESHANO, LITLHEKEFETSO TSA BASALI LE BANANA, MEBUSO E FETO-FETOHANG KHAFETSA KE LINTHO TSE FETOHILENG TABA EA MEHLA. LITABA TSENA LI RE BAKELA BOPHELO BO BOSULA BO RE TLISETSANG TLHOKAHALO EA KHOTSO LE BOTSITSO, HO NYOTOBELA HOA MORUO LE LEQEME LA MESEBETSI.

RE LE NAHA ENA EA MOSHOESHOE, RE LUTSE RELE MELOMONG EA BAAHISANE BA RONA. RE LUTSE RE LE KA TLASA TATAISO EA SADC. E SE ELE NTHO E TSEBAHALANG HORE BALEKANE BA RONA BA SEBETSANA LE HO KENA LIPAKENG KHAFETSA LITABENG TSA LESOTHO. RURI SENA SEA RE FOKOLISA MAHLONG A MACHABA LE MEKHATLO EA LEFATŠE EO RE SEBETSANG LE EONA. LEHA MABOTHO A



ROYAL PALACE
KINGDOM OF LESOTHO

RONA A NTSE A SEBETSA KA BOKHABANE HO NAMOLA
NTOA NAHENG EA MOZAMBIQUE, EMPA TABA EA HO
NAMOLOA KOANO HAE E HANA HOEA MORITING.

RE HLOKA HO SEBELISA MONYETLA ONA HO IPOPELA
LESOTHO LEO RE LE LABA-LABELANG. RE HLOKA HORE
SERITI SA NAHA EA RONA SE BOELE MOO RE KA IKOTLANG
SEFUBA KA HORE RE NAHA EANE EO MOTHEHI OA EONA A E
THEHILENG HOLIMA MEKOLOKOTOANE OA KHOTSO.

HO BITSA PARAMENTE E QHALUOENG KE TABA E QALANG
HO ETSAHALA NALANENG EA LESOTHO. RE TLA E TSA JOALO
HOBANE RE ENA LE TŠEPO E TIILENG EA HORE KE
MONYETLA OO RE NANG LE OONA OA HO LOKISA LESOTHO
LE HO LE PHEKOLA BOKULING BA LONA BA NAKO E TELELE.
LEHA HO LE JOALO, PHETISO EA LIHLOMATHISO TSA
MOLAO TSEO KE LI BOLETSENG HASE PHELETSO EA LEETO



ROYAL PALACE
KINGDOM OF LESOTHO

LENA LA TLHOPHO BOCHA, KE QALEHO EA LEETO LE TLANG
HO NKA NAKO E TELELE HO PHETHELOA.

HAPE, RE LOKELA HO HOPOLA HORE HA FELA RE SA
SOKOLOHE MOEENG, LIPELONG LE LIKELELLONG RE TLA
LULA RE LE SECHABA SE HLOKANG KHOTSO, KATLEHO LE
TSOELOPELE.

BAHLOMPHEHI BA KHABANE, LITHO TSA PARAMENTE,

KE RATA HO IPILE TSA HO LONA HORE LE ITAHLELE KA
SETOTSOANA HA LE KENA MOSEBETSING ONA. JOALO KA
NAKO E FETILENG, KE LE KOPA HO BEHA KAPELE LESOTHO
LE SECHABA SENA SA BASOTHO. KE KOKOTA LIPELONG
TSA LONA HO ITEBALA BO LONA LE HO HOPOLA HORE KE
FEELA HA LESOTHO LE ATLEHA BOHLE RE KA KHOLANG
LITHOLOANA TSE MONATE. HOPOLANG MAIKUTLO A
SECHABA SA BASOTHO HA HO NTSE HO BOPUOA TABA EA



ROYAL PALACE
KINGDOM OF LESOTHO

TLHOPHO BOCHA. HA RE BOPENG MELAO E HAPPELLANG MAIKUTLO AO A SECHABA, ETSOE REA TSEBA HORE "LENTSOE LA SECHABA KE POHO". HA RE ETSETSENG CHABANA SENA SA KHOMO MERALO E NENANG KHETHOLLO KA MEFUTA EOHLE EA EONA LITSING TSA BOSEBELETSI BA SECHABA, LE HO TSA TŠIRELLETSO. RE ETSE MERALO E TLA TIISA BOIKEMELO BA MAKHOTLA ELE HORE ATLE A ABE TOKA HO BOHLE KA HO LEKANA.

SECHABA SA BASOTHO SE LLILE NAKO E TELELE SE TSETSELELA KHOTSO. RURI RE SE UTLUILE KAOFELA. HA RE BENG PELO TLHOMOHI MME RE BA SEBELETSENG KA NNETE LE KA TIEO. MATSATSI ANA AO RE A FUEENG, HA RE A SEBELISENG MOLEMONG OA HO HABA METHEO EA KHOTSO EA MOSHOELLELA.

KE QETELA POLELO ENA KA HO LAKALETSA BASOTHO BOHLE, KOANO LESOTHO LE HOOHLE MOO BA PHELANG



ROYAL PALACE
KINGDOM OF LESOTHO

TENG KHOTSO LE BOPHELO BO BOTLE NAKONG ENA EA SELEMO SE SECHA SA BASOTHO. E SE EKA RE KA BA LE KATLEHO TEMONG HAELE MONA SELEMO SE THOASITSE.

HA ELE MONA HO SE HO SETSE NAKO E FOKOLANG PELE RE EA LIKHETHONG TSE AKARETSANG TSA NAHA, KE NKA MONYETLA ONA HO LE LAKALETSA LIKHETHO TSE MOFUTHU TSE LOKOLOHILENG, LIKHETHO TSA KHOTSO.

**MOLIMO O BOLOKE LESOTHO, MOLIMO O BOLOKE
BASOTHO.**

KHOTSO , PULA, NALA.